



Litt av alle blåskjela som skal bli til englar.

Biletet over viser blåskjel som ligg til tork. Fredag førstkommande skal dei verta til flotte englar på engleverkstaden i Uskedal kyrkje i samband med julegrantenninga. Julegrana er også klar til å tennast. Mandag var den faste pyntegjengen, Lars Myklebust, Ståle Eik og Knut Steinsletten, i aktivitet, og fekk på lass dei 70 pærene fordelt på 7 lenkjer i tillegg til pæra i toppen.

Tenninga skjer kl.17 fredag til julemusikk av Uskedal musikklag. Dette er 55. gong den flotte julegrana vert tent i sentrum av bygda, og musikklaget har i alle år sytt for pynting og musikk i samband med tenninga. Engleverkstaden var nytt på programmet i fjor, det vart ein stor suksess. Mange barn med foreldre møtte i kyrkja og det vart laga flotte englar i ulike variantar. Dette kjekke tiltaket vert fulgt opp i år, og det startar litt etter at Grano er tend. Då er det berre å ta turen i kyrkja.

Nytt i år er det at dei aktive ungdommane i DNT Ung Kvinnherad stiller opp og grillar pinnebrød om veret tillet det. Og grilling vert, for vergudane har lova å vera i godlag for å vera med og skapa den rette førjulstemninga på fredag.

Som vanleg er det Damevennen som står for hovudarrangementet, og dei byr på grautsal i Helgheimskjellaren,

peparkakepynting og salg av lappar og kaffi oppe i Helgheim, kaffi og gode kaker i Gamleskulen.

Børsdalsnissen er reist på internasjonalt oppdrag så han vert ikkje med dette året, men truleg dukkar det opp einkvan av dei andre frå den snille nissefamilien i Børsdalen.

Tekst og nett: Thor Inge Døssland

Foto: Nelly Kjærland